

समे – 12:25

<><><><><>

एह आकाशवाणी जम्मू ऐ, हुन तुस श्रुति खजूरिया कोला खबरां सुनो।

CM – Review Meet

मुख्यमंत्री उमर अब्दुल्ला होरें कल सिविल सचिवालय जम्मू च इक उच्ची सतह दी बैठक दी अध्यक्षता कीती ते जम्मू खित्ते च जरूरी सेवाएं ते सप्लाई दे बंड सरिस्ते दे कन्नो कन्नी मजूदा गर्मिं दी रूतै दरान प्रशासन आस्सेआ पुट्टी गेदी गैई दी समीक्षा कीती। बैठक दरान जम्मू दे डिवीजनल कमीशनर रमेश कुमार होरें मुख्यमंत्री होरें गी बक्ख-बक्ख मुत्तलका मैहकमें आस्सेआ गर्मिं गी लेइयै कीती जा'रदी तैआरिं बारे जानकारी दित्ती। किश नमें रिहायशी इलाकें च पानी दी कमी दे मसलें गी ध्यानै च रखदे होई मुख्यमंत्री होरें जम्मू नगर निगम दे कमीशनर ते जल शक्ति मैहकमे गी निर्देश दित्ते ले ओह पानी दे टैंकरें कन्नै ग्राएं दे लोकें गी फौरी तौरा पर राहत देन। मुख्यमंत्री होरें आँदे मुहरम ते श्री अमरनाथ जी दी यात्रा लेई कीते गेदे व्यापक प्रबंधें दा बी जायजा लैता।

<><><><><>श

CM Tourism

मुख्यमंत्री उमर अब्दुल्ला होरें आखेआ जे सरकार चांहदी ऐ जे जम्मू खित्ते गी सैलसफा खास करियै धार्मिक सैलसफा दा इक प्रमुख केन्द्र बनाया जा तां जे एहदे कन्नै मकामी लोकें दे जीवन च आर्थिक तौरा पर बदलाव आई सकै। मुख्यमंत्री होरें एह गल्ल सांबा जिले च नमें बनाए गेदे सरकारी डिग्री कालेज पुरमंडल परिसर दा उद्घाटन करदे होई आक्खी। अपने संबोधन च मुख्यमंत्री होरें इसी इक गर्व मसूस करने आला पल करार दित्ता ते आखेआ जे एह जम्मू खित्ते च उच्च शिक्षा लेई इक मते महत्वै आला मील दा पत्थर ऐ। इस मौके पर विद्यार्थिं आस्सेआ पेश कीती गेदी मंगें दे परते च मुख्यमंत्री खास तौरा पर नमें शैक्षणिक कोर्सें गी शुरू करने बारे भरोसा बी दोआया ते आखेआ जे उंदी जायज मंगें पर पक्कम गै बचार कीता जाग। मुख्यमंत्री होरें समाज दे निरंतर विकास च सेहत मे शिक्षा दी महत्वपूर्ण भूमिका पर लोह पाई।

<><><><><>

Secy MSDE-Meeting

हुनर विकास ते उद्यमिता सरबन्धी मंत्रालय दे केन्द्रीय सचिव अतुल कुमार तिवारी होरें सिविल सचिवालय श्रीनगर च इक उच्च यतह दी बैठक लाई। इस दरान पी.एम विश्वकर्मा, प्रधानमंत्री कौशल विकास योजना संकल्प ते होर दुए जतनें दा जायजा लैता गोआ। बैठक गी संबोधत करदे होई सचिव होरें सिखलाई कार्यक्रमें गी मकामी अर्थबवस्था दी समर्थ ते उद्योगिक जरूरते स्हाबै बनाने ते करोआने लेई गलाया। उनें अफसरें गी हिदायत कीती जे ओह लौहकी अवधि आले सिखलाई कार्यक्रम आयोजित करोआन। सचिव होरें

उच्च शिक्षा मैहकमे दे नुमायंदे गी जोर देइयै आखेआ जे ओह मंत्रालय दी बक्ख-बक्ख स्कीमें थमां लाह ठोआन।

<><><><><><>

CS-Secy MSDE

मुख्य सचिव अटल डुल्लू होरें हुनर विकास ते उद्यमिता सरबंधी मंत्रालय दे केन्द्रीय सचिव अतुल कुमार तिवारी हुंदे कन्नै मलाटी कीती ते जम्मू कश्मीर च हुनर विकास ते उद्यमिता सरबंधी जतनें गी बघाने बारे चर्चा कीती। इस दरान नमीं केन्द्रीय स्कीमें ते मतूदा प्रोग्रामें गी मजबूत करने बारे चर्चा होई तां जे जम्मू कश्मीर दे हुनर विकास तंत्र गी मजबूत कीता जाई सकै। केन्द्रीय सचिव होरें नमीं शुरू कीती गेदी केन्द्र प्रायोजित स्कीमें बारे व्यापक जानकारी दित्ती। जेहदा मकसद मुख्य भरै दे आईटीआई गी आधुनिक बनाना ऐ।

<><><><><><>

Yoga Day-Country

11में अंतर्राष्ट्रीय योग दिवस दे मौके पर संस्कृति मंत्रालय देसा दे 100 सैलानिएं आली प्रतिष्ठित थाहरें ते 50 होर सांस्कृतिक थाहरें पर योग सत्रें दा आयोजन करियै योग दे 11में अंतर्राष्ट्रीय दिवस मनाग। कल होने आले एह कार्यक्रम आयूष मंत्रालय आस्सेआ विशाखापत्तनम च आयोजित कीते जा'रदे मुख्य उत्सवें दे पूरक होंगन, जिंदे च प्रधानमंत्री नरेन्द्र मोदी बी हिस्सा लेंगन।

<><><><><><>

DC Kishtwar-Yoga

11में अंतर्राष्ट्रीय योग दिवस दे मौके पर कल किश्तवाड़ दे एतिहासक चौगान मैदान च इक भव्य कार्यक्रम दा सरिस्ता कीता जा'रदा ऐ। इस बारे तफसीली जानकारी दिंदे होई डिप्टी कमीशनर किश्तवाड़ पंकज शर्मा होरें आखेआ जे सब्बे सरकारी मैहकमे योग दे महत्व गी उजागर करने लेई किट्ठे रलियै इस कार्यक्रम दा आयोजन करा करदे न। उनें इस गल्लै पर जोर देइयै आखेआ जे योग दे फायदे छड़े शरीरिक गै नेई सगुआं एहदे कन्नै मानसिक ते अध्यात्मिक लाह बी होंदा ऐ। उनें किश्तवाड़ जिले दे सब्बने बसनीकें गी इस भव्य आयोजन च शामिल होने लेई साददा दित्ता ऐ।

<><><><><><>

Tourism Stakeholder

सैलसफा गी लेइयै इक समावेशी ते असरदार नीति तैआर करने लेई जम्मू कश्मीर सरकार दे जतनें दे इक हिस्से तौरा पर जम्मू च सैलसफा निदेशालय नै वीरवारें इस खेत्तर कन्नै जोड़दे हित्तधारकें कन्नै सलाह

सत्र दा आयोजन कीता। बैठक च सैलसफा खेत्तर दे विकास लेई असरदार नीतियां बनाने पर जोर भरेआ
गेआ। सत्र दी अगुवाई सैलसफा मैहकमे दे निदेशक विकास गुप्ता होरें कीती। जेह्दे च सैलसफा कन्नै जुड़े
दे प्रतिनिधिएं दी शमूलियत बी दिखने गी लब्बी।

<><><><><><>

World Refugee Day

अज्ज विश्व शरणार्थी दिवस ऐ। पूरी दुनिया च शरणार्थियों दे प्रति सम्मान व्यक्त करने लेई संयुक्त राष्ट्र नै
इसी अंतर्राष्ट्री दिवस दी मान्यता दित्ती ऐ। एह् ध्याड़ा ओकड़े लोकें दी दलेरी ते ते ताकत दा सम्मान
करदा ऐ जिनें'गी कुसै संघर्ष जां यातना करी स्वदेश छोडने गितै मजबूर होना पेआ ऐ। इस ब'रे लेई इस
ध्याड़े दा विशे—सार ऐ — शरणार्थियों कन्नै इक्कजुटता। एह् विशे लपजें थमां परे जाइयै शरणार्थियों दी
सहायता लेई सार्थक गैहीं पुट्टने लेई प्रेरित करदी ऐ। संयुक्त राष्ट्र शरणार्थी आयोग नै कल नमीं दिल्ली च
यूनेस्को दे सदर दफतरै च इस सरबंघे च कार्यक्रम दा आयोजन कीता।

<><><><><><>

Read by Shruti Khajuria

Composed Mukesh Gupta

Editor Kunal Shrivatsa

Skilled Rajat